

"...MIRA CHI NO' EST PECCADU..."

Unu puzonéddu bolad'apretàdu...
 dae sa grunda a su campu
 ûe sas ispiigas chiberas undulant
 a su 'entu...andad'e torrad'e isparit
 in cussu mare 'e oro e furat sos ranos
 chi han'a servire ad'attattàre sos fizittos...
 emmo, issu est furende a su maggaju
 chi l'hat semenàdu, senza timire
 mancu cussu pinnàzzulu 'e paza chi pâret
 lu cherfat propiu assucconare...
 e torrad'a su nidu cun su pìttulu pienu
 e sos minoreddos l'isfrappana sos rânos
 de su trìgu...hant famine, non sunt bastantes...

" calmadebos chi già bos nd''àtto ancora..."
 lis ciulad' e torrad'a su campu...

" Furà puzonéddu chi no' est peccadu
 su tou, est amore ! Su Déus Bonu
 cund'unu risittu ti donat su perdonu .
 Issu ti connoschet bene, est Issu chi t'hàt criàdu...

Puru tue, Babbu isfortunadu,
 senza sièndas nè trabagliu, cun tantos
 fizighèddos ch'hàn famine e frittù meda
 intro, ispintu dae s'amore hàs furàdu
 eppuru non ses ladru, ma sa legge umana
 non t'hat perdonàdu cà non ti hàu cumprésu,
 assòra hàs pagàdu su dépidu
 e tòrras a dômo tua, a manos bôidas,
 umiliàdu, ma garrigu de ispèras bônas
 e de illusiones...e, ancora senza sièndas,
 isettas giustiscia e aggiudu dae sos frades bônos...
 sinòno, forsis, hàs a furàre ancora
 prò buscàre su pane a sos minorèddos,
 eppuru non ses ladru..... e mira chi
 a furare pane no' est mancu peccadu !